

صمد بهرنگی نین نیسگیلی خاطرہ سینہ

صمد دنیاسیندا

اسماعیل جمیلی

سانکی گونش بویانیردی او سحر
 آراز بویو سوسان لال اولان قوشلار
 آیری لیکدان آیری دوشه بیلمه یین
 داملا داملا گۆز یاشیندا نرگسین
 کیم دئیردی سئل لر سارادان سونرا
 آرازین بیلمز بوروخلاریندا
 اوگون گۆزو یولدا قالان سهندین
 یوخسول اوشاقلارین اومود چیراغی
 اوغورلانندی کوراوغلونون قیر آتی
 ظالم خانلار سارایلاردا گولرکن
 بیر شافتالی آیری دوشدو مین یندهن
 قارداناسی اؤز ناغیلین دئیرکن
 ئولوملو سورگونلو ایللردهن سونرا
 دیلی باغلی اسیر اولان ائللرین
 او بیلیردی داش یئرینده آغیردیر
 ایللر بویو سورهن دردین درمانین
 سئوگی دولو آرزوی دولو حیاتی
 یاراتدیغی ناغیل لارا قوشولدو

افقی توتمودو آغیر قارا چن
 یاشیردی لار گلن آنلاری ارکن
 لاله لرین باغری دولو قان ایدی
 قایالار اوچوران بیر طوفان ایدی
 گۆز تیکیدیر خان چوبانین یولونا
 صمدین حیاتی چاتاجاق سونا
 دادینا چاتمادی ساولان بابا
 کند اوخولاریندا یانمادی داها
 مصری قیلینچ چیخماز اولدی قینیندان
 بیر جنگی گلهمدی عاشق جنوندان
 خیردا قارا بالیق ایتیردی یولون
 سوسوزلوق قوروتدو تلخونون کولون
 او بیر چیراغ ایدی یولا نور ساچان
 قورتولوش یولونون اؤنونو آچان
 گووه نیردی اوز ائلینه دریندهن
 آختاریردی قایناقیندان یئریندهن
 یئتسه ده سونا اوگون بیر آندا
 آدی ئولمز اولدی آذربایجاندا

29 شهریور 1367/29

اورهوس، دانمارک